

Ada golongan yang burukkan Kerajaan — Aishah Ghani

KUALA LUMPUR, Selasa. — Menteri Kebajikan Am, Datin Paduka Hajjah Aishah Ghani hari ini mendedahkan adanya golongan tertentu yang menyebarkan khabar-khabar angin memburukkan Kerajaan menjelang pilihanraya akan datang.

Katanya, khabar-khabar angin itu direka oleh golongan itu dengan tujuan menimbulkan rasa syak wasangka terhadap Kerajaan dan wakil-wakil Rakyat.

"Di samping itu, ada juga khabar angin yang bertujuan menanamkan rasa benci rakyat terhadap Kerajaan," tambahnya.

Berucap merasmikan kursus sivik untuk penyelia dan guru-guru KEMAS di sini, beliau berkata, cerita dan khabar angin itu direka dengan bijak sehingga dipercayai oleh mereka yang mendengarnya.

Kesedaran

Dengan itu katanya, adalah menjadi tugas dan tanggungjawab penyelia dan guru-guru KEMAS untuk memadamkan segala khabar angin yang telah, sedang dan akan tersebar menjelang pilihanraya akan datang.

Datin Paduka Hajjah Aishah seterusnya menyeru penyelia dan guru-guru KEMAS menekankan faktor-faktor "dorongan" dan "kesedaran" dalam menjalankan tugas mereka membangun dan memajukan masyarakat.